

葉天寥年譜

二



甲行日注卷一

華桐流衲木拂纂

甲申舊京警蹕之後卽當枕戈灑泣鞠旅北征君志
膽薪臣希種蠡上報先帝之讎下慰中原之望而天
渝不敬泄然方蹶則扼長淮要險祖述晉宋俾板蕩
餘民不至左衽幸爾乃鎮帥交攻蒼靈塗炭姦臣竊
柄權賄薰天胡羯乘釁而生心焉噬臍何及之有乙
酉弘光改元正月朔旦余草莽臣不敢問國家大事
祇爲吾郡筮之遇豐之復九四豐其蔀日中見斗遇
其夷主吉象曰豐其蔀位不當也日中見斗幽不明
也遇其夷主吉行也余慙然曰夷主得無夷狄之主

乎大明方再啟運而象曰幽不明何也倘夷人亂華

胡馬南牧之兆乎震九四納甲庚午在乾九四卽壬

午恐當在五月耳

甲申五月庚午建也乙酉五月壬午

復六四中行獨

復固也其如遇何迨五月九日虜訐京口六月四日

至郡猶夏至中氣也

初八日小暑

亡何有錢唐公之難余

以婚姻孔云幾中於禍朱子夏趣余爲天目遊余念

昭代大烈遠軼千古必無胡人一駕反掌易之況吾

邑忠義首冠江以南秉枹執戟之士雲蒸霞蔚何氛

之不靖而兒輩鼓厲宗族負餽義旅招徠草澤聞風

興起者傾心恐後又山左宋王謝李諸進士左蘿石

夫人

左名懋第死節

楚中傳尙書

名淑訓

各乘鄂君青翰之舟

家丁百餘柘弓妍矢紅鏐繡袷載其珍匱寶筥翠鬢
金粉卜居湖上棲止廬舍方以桃源避秦可忘漢晉
豈僅旄頭毳旃不問諸水濱也魏太子南皮之游褚
太傅銀鱗之夕實兩閱月矣泊八月十三日山左諸
君覩秋風而起感睠故國以生悲遂俱別去余時酬
應初息杜門爲幸而二十一日翕訛之徒煽虜南下
二師皆潰

吳日生
沈君晦

虜勢大張益驕憤吾邑甚有不如

其令者引頸而比屋僇也士大夫遂推紉以媚焉余
歎曰郭景純有言黔黎將湮於異類桑梓其翦爲龍
荒乎韋元成詩曰誰能忍尋寄之我顏臣子分固當
死世受國家恩當死讀聖賢書又當死雖然死亦難

言之姑從其易者駱丞續樓觀滄海句耳御匣朝開
郊壇夜集固我讓皇帝君臣家法也於是決計游方
外以遯時八月二十四日也

二十五日甲辰微雨四更起櫛沐告家廟辭之同子世

佺

雲期

世侗

開期

世倅

星期

世倅

弓期

往圓通庵三幼孫藏之

他所冀存一綫長名舒崇六歲次舒徽四歲又次舒
疑二歲庵主達元留余且再觀去就

二十六日乙巳大雨以兩先人及亡婦子女遺像七軸
家譜一帙誥敕六軸余詩文雜著八本午夢堂集六
本授達元爲護藏之他日天心厭亂返我故服彭咸
舊都之居孫綽遂初之賦亦未可知至晚嚴甥仲日

來名祇敬文靖公會孫云我亦拜辭老母偕往矣母卽余姊賢

智識大體謂甥曰爾非名宰輔子孫乎若去一絲髮爲虜卽日在我前我死目亦不瞑汝若全去髮爲僧天涯海角我心亦安遂同宿庵中有浪船人張安曾貸余十金以備檣帆五六年矣頃六月亦棄舟去不知何往是日忽冒雨來見泣涕悉其苦狀袖出十金償焉藉之爲萍蹤之助小人好義如此故識之

二十七日丙午雨曉起理裝家人輩至庵中拜別余曰

此行也若幸中興有期則歸來相見亦有日不然從

此永訣矣兩幼主室家之好未完

信僮未婚

豈不痛心然

留之事虜必不可我亦無可奈何耳三孫不及見其

長大幸爲我善視之踞湖山先隴松楸幸念之毋忘
聞虜令遜不降者籍入不腆數畝與環堵之室不暇
計矣顧夫人公子向受錢唐公之託今亦有愧九原
當令善返崑山耳諸婦女可寄西方尼庵汝輩但爲
謀其餬口者俾無凍餒以死感且不朽家人皆伏地
哭余亦泣登舟二兄幼輿叔秀姪來送姪孫舒胤亦
來時年十五淚潛潛不止矣旣發冒雨至棲眞寺卽
香上人簡庵夜可生上人爲祝髮焉卽此後或有黃
冠故鄉之思但恐彭澤田園門非五柳遼東歸鶴華
表無依耳

二十八日丁未雨

二十九日戊申雨俱在簡庵余患河魚之疾二十日矣
日間胸懷作惡困悴尤劇家自七月中澣廩人告匱
借一從昆米十石食指率然又復告罄茲行攜圓通
庵米一石錢二千文子路曰傷哉貧也又當此亂世
彼華膳何人者歟

九月初一日己酉晴恩恩戒行李矣倏忽病瘡

初二日庚戌雨早別二上人行

卽香可生

余曰行將焉往有

言雙徑有言武林有言鄧尉余曰我吳人也不可更

入吳其湖與杭乎先是錢唐公二使同法相寺聞修

來在余湖上顧夫人商公櫬計猶豫未決故聞修因

未卽歸而湖澣無多庵寧初俗家武康二公可仗也

遂同行出王涇塘虜以空漕艘掛帆而南纍纍不絕
舟人怵焉風雨濺灑煙波沙漠遠樹低天荒葭冷岸
滿野黃雲偃蹇深潦中俛首如泣正自使人斷魂耳
未至烏鎮十里風狂雨橫暝色愁人道邊小橋之北
有經堂庵聊爾借宿

初三日辛亥霜降微晴早至瀘頭鎮雙徑道第不可行
也夜至衛村無僧舍可借舴艋隘甚不能展衾僅和
衣一倚枕耳

初四日壬子曛曛日出矣方鼓枻又雨過石門頽牆廢
垣殘毀駭裂野店無煙晨星數人兵火後光景真可
太息次塘西又值虜舟幸疾雨飛注虜遙不見津梁

疲矣迷途生悵昏霧歸鴉荻花無語又如樊道漏天
淋漓不止正徬徨閒有漾永庵屹然水湄繫纜而登
主僧嗣明留宿水閣中綠萍覆池衰柳依依隄上籠
煙曳雨滿目淒涼

初五日癸丑大雨早至一華庵超寰開門揖入

聞修之師采

園橘供茶橘色正青甘香獨異錢唐公使者自香積
兜夜歸云虜聞江東兵至日夕巡譙警堞斷橋秋色
半在羌笳胡柝中未可問西子湖也

初六日甲寅雨

初七日乙卯晴寧初辭歸

初八日丙辰陰兒輩同曇津

治平寺僧

訪東山之勝得華桐

鵑安廬將移笈就之

初九日丁巳大雨午後微晴

初十日戊午晴乍寒冷甚兒輩再往安廬定居停之約
余無聊獨步廡閒見殘帙一小詞太平時序兒女柔
情不覺銷凝久之詞云韶光悄悄溶溶處半是落花
與飛絮人靜晝長重門深閉芳簾疏簾無語 畫屏
春夢正來時上苑東風又歸去燕子泥香游絲日暖
一霎薔薇紅雨

十一日己未晴令兒輩既定約攜僮一往灑埽其房久
乏足音矣云銀杏殼燒之可以辟蟣蝨

十二日庚申晴暖午後遷安廬自劉家橋上岸兒輩學

行腳僧自擔榔栗余與曇津先行可二三里至華桐
隄鑿山爲陞三面皆峰箬籬菁徑高下委折主僧云
此雲棲惠文師所創安廬榜李長蘅書也屋西嚮供
佛北嚮爲香積南嚮聽竹軒二閒居焉修篁千榦錯
以松檜楓梓諸木夾蔭四圍碧岫如蛾眉臨鏡浮出
黛痕半抹在千重綠步障閒黃花四五枝婀娜依人
佛前供香圓一盆杳非日來想際屋後流泉淙淙如
美人銀甲挑箏絃柔緩中作鶯栗響擘竹爲筏繇山
坳屈曲引下滴之池晝夜來天高月迴空山無聲摩
挲林影下如在洞天非人世矣

十三日辛酉五更時松濤竹韻會心不遠曉起卽濛濛

如霧尋大風溼雲繚繞天際矣午大雨甚冷

十四日壬戌晴日色射松竹閒如流黃碎錦金剪刀裁
出兒輩興會所寄登崇巔眺錢江逾嶺至半山訪神
女廟神女倪氏處子也宋高宗初兀朮追至臨安女
避亂出奔旋死埋半山下卽託夢諸將帥必速決戰
我以陰兵助汝諸將異之遂戰果以神助獲勝共爲
立祠至今廟貌不毀然香火冷落甚矣余謂正當葺
其土木冀明鑒於神焉可也

十五日癸亥晴暖佺病

十六日甲子晴風日霽潔纖雲不飛花影移紙窗上蕭
疏如畫能無思發花前之歎初食苦珠似榛栗而小

同豆煮之則苦味出矣山中最多

十七日乙丑晴暖寧初又來云田園尙猶如故室廬亦幸偷存故鄉風景則半似遼陽以東矣但村人未會吹蘆管耳

十八日丙寅立冬晴暖午後陰晦有餽鯽魚四頭余戒殺久矣又僧舍中余屋後有小池放之屋背枕圓峰端如覆釜池在釜之下上承流泉琤琮作響池底蒼苔綴密蔭以高松臨流俯挹衣裙亦綠矣魚如游碧波玻璃鏡中寒光皎映夜聞山中如人大呼者寧初曰此麋聲也

十九日丁卯晴暖寧初往臨平訪朱子夏夜至亦已爲

頭陀

二十日戊辰晴與子夏坐石上看紅葉頽霞千片錯繞
青翠閒斜陽半掛四無人聲涼風微動葉葉如欲吐
語

二十一日己巳晴子夏早行

二十二日庚午晴住十日矣初聞山鳥嘯風恨無子規
聲春來滿山亂嘯入秋卽止

二十三日辛未晴印虛上人來醫不忝九折臂藥更精
美僊又病瘡

二十四日壬申晴時去家莢落矣仲日旣感白雲親舍
之思又念征途爰止倚閭未知也故與寧初同歸但

病者在牀行者在道秋氣生悲忽當言別分袂增愴
更傷羈旅秋興賦云彼四感之疚心遭一途而難忍
嗟秋日之可哀諒無愁而不盡然總不如江文通黯
然銷魂一語也

二十五日癸酉陰雲繁霰細雨微零北風振條颼颼送
冷四山木葉十有五六紅矣前與子夏看者又半已
脫去忽忽傷懷

二十六日甲戌陰冷朱子夏遣訊致醫陳起巖來高襟
樸袖術亦名家之傳也

二十七日乙亥晴冷超聞二公來候日落木靜寂寂凝
寒父子五人而二子臥牀二子兼執僕役一僮又病

懷慘之況對景倍盈

二十八日丙子晴冷詠少陵詩南菊再逢人臥病北書
不至雁無情淒然泣下

二十九日丁丑晴

三十日戊寅晴客有談王孝廉昭平名道焜陸大行鯤庭

名培俱殉節死陸郎北府之年尤爲難耳山陰劉祁二

中丞則先於七月閒一謝孤竹之粟劉公宗周念臺一捐沅

江之袂矣祁公彪佳世培

十月初一日己卯晴暖

初二日庚辰晴暖宏濟上八來

初三日辛巳晴暖